





天主教主所

1893

MONTREAL

聖  
母  
行  
寶

MAISON MERE DES SOEURS

MISSIONNAIRES DE L'IMMACULEE-CONCEPTION

2900, CHEMIN SAINTE-CATHERINE

MONTREAL, P. Q. CANADA

NAZARETH, 1893.



天主降生壹仟捌百玖拾叁年

香  
港  
主  
教  
若  
望  
高  
准



香港納匝肋靜院印版



聖母行實目錄

卷一

總述

卷二

聖母爲天主無始預簡聖母

聖母蒙主寵福預證

聖母始胎

聖母生誕

聖母童貞

聖母精修

聖母聖績

聖母升天

聖母天福

聖母端冕

欽崇聖母何義

聖母於欽崇者何報



卷三

聖母提佑誦玫瑰珠等經者

聖母護祐帶聖衣者

聖母提祐持其齋者

聖母蔭保國家

聖母啓牖愚蒙護提學者

聖母援提垂終之難

聖母提拔貞潔之危

聖母濟窮難

聖母罰儆不肖者



聖母行實卷之一

總述

聖母者。乃造成天地萬物真主降生爲人所受孕之母也。行實多端。非筆舌能罄。茲特畧表其氏族及聖功之尤著者。先總近其大概。而後分寫之。約爲三卷。其一推聖母之所自生至老。歷年之行狀矣。其二借古經聖人之言。以著聖母之大德。分爲十二端矣。其三述其聖迹。亦分八端矣。讀者於第一卷。即發熱愛聖母之心。於第二卷。即發誠信聖母欽崇之心。於第三卷。即發冀望聖母主保之心。夫愛信望三德。乃事天主事聖母之本德。俾從教諸士知所敬仰云。



緝匪助者。是如達國名郡也。自古以來。人類相傳。惟知欽崇一造物真主。中有王裔名若雅敬。妻名安納。夫婦幼習正教。密於精修。以其家貲。均分爲三。一資聖殿。一贖窮乏。一留自給。由是恩惠廣及。爲衆感仰。第居室多年。享諸順境。獨患無嗣。蓋世福缺陷難全。類如此也。乃夫婦修越加勤。惟祈天主寵賜厚嗣。又許即幸得嗣。必送聖殿。奉事天主。不敢背愿。未幾。一天神降來。示若雅敬云。天主大慈憫爾。已允爾願。期年之內。爾妻當受孕。產一淑女。名瑪利亞。此女自母腹遂徠聖德。爾宜慎保之。言訖。復告安納。更叮嚀勿慮勿疑。惟堅篤其望。將必無負。遂辭去。夫婦各述神語。且信且感。時冬至前十有餘日。安納受孕。此係古教紀述真確。無可惑者。



凡受生者。當形靈交合時。皆染始祖之病。所謂原罪也。一染此罪。則性爲劣弱。易就諸惡。難修諸德。獨瑪利亞。蒙天主祐寵。免其夙染。始胎即含聖德。是以形靈之潔。特超衆聖。其一生易進諸德。實本於此。蓋天主旣寵之爲母。豈容些惡玷染。古今聖賢萬口一言。咸謂聖母與日爭光。與玉比潔。絕不受染原罪矣。受孕九月後。於納匝助誕生。莫但父母之樂。實係普世之慶也。生八日。從國俗立名。即依天神所稱瑪利亞稱之。至八十日。若雅敬及安納夫婦。依古禮。抱瑪利亞獻天主台前。並獻所携禮物而返。自後弗敢私恤輕視。惟致力盡心。善其本躬。以率於神修。至滿三歲。慶酌前愿。特赴日露撒冷國都大殿中。先以潔物享獻天主。次謹告曰。斯小



女。乃昔予夫婦懇切祈望。而幸卒獲者也。今滿三歲。弗敢忘主大恩。久留私室。以違前愿。恭獻台前。望吾慈主惠納於斯。俾得終身服事。幸甚。再向司教者曰。是女也。上主允予夫婦之求。而錫之。今復歸之。義也。惟吾師以道德引而成之。則夙願畢矣。是時瑪利亞。即一心向主。辭別父母。絕無累念。蓋已立遠脫世情。欽崇天主之表矣。

於是司教者。一見瑪利亞。年雖甚幼。而儀容端飾。甚異凡女。即知中懷聖德。欣然居之。童女之宮。宮立殿側。蓋容一國所寄童女。使之伏聽賢婦之訓。靜習女德。及長大遣歸。以禮嫁之。瑪利亞初入女宮。猛立高志。絕諸嬉笑幻態。惟密登聖殿。朝拜天主無移。或入



私室私自嚴察其念其言。並其動靜。合宜與否。漸至默思。天上之事。沉潛涵泳。洞徹聖道微奧。益加勤修。優迨聖域。其見餘外。多聞寡言。謙己尊眾。視女中善行者。輒師事而法之。長者有命。雖苦不辭。採取善言。踐行善行。衣素弗文。食粗弗飽。臥斂弗尸。言遜弗傲。其動履端莊而不促急。其容色和婉而無煩憂。與同侶交。不但毀言。妄語不設。即狎笑躁情不形。周旋中禮。無微敢失。且又時執卑役。遵命事長。顧病濟困。掖弱扶危。或勤事女工。不厭以供祭主。或恭玩經典。罔怠以益神糧。妙義會心。應存自警。則隨筆以紀之。偶偕同志。可與發明。則直揭所得以授之。總之起居表裏。隨地隨時。無不盡分合宜。蓋將弘肇聖業之基。自應若是其深且固也。乃天



主恒加寵愛。每遣天神臨格。密爲啓示。倍其功德。日益精純。由是同修女伴。衆競興起。而趨法恐後焉。然其德愈盛。其心愈虛。更求精進。未或少息。譬川潦集之益盈。而其就下益速也。至十一歲。父母壽終。瑪利亞用其所遺禮葬既畢。乃益自勵。趨向至善。知天主所與時日。不可輕棄。因立志精潔。絕却財色名三欲。誓不少染。蓋斯人雖有卓越之志。苟於三者。一有迷惑。必不克前。故凡聖教中。誓永修貞潔不移者。必以瑪利亞爲正鵠焉。

至十三歲。當世俗婚期。司教者以無父母。因與其戚屬代議嫁之。以繼其祖之後也。瑪利亞聞之。急辭曰。昔父母猷我於斯。終身奉事上主。吾承二親之意。誓守永潔以謝主恩。豈敢婚配焉。司教者。



欽服其言。未敢決。乃告請於天主。天主乃默授厥旨。令瑪利亞同族公議所配之人。又遣天神示瑪利亞勿懼。主必保守爾貞。不致妨碍。茲眾所擇配。實係終身持潔之信士。天主不過俾爾僅成婚禮之迹。一則杜人世之嫌疑。一則障阻蠱惑之鬼魔。弗使明達天主降孕之道也。瑪利亞既獲主旨。即順司教之命。歸於若瑟。若瑟蓋王室之胄。亦自幼精修。不染世塵。茲乃伏領主命。恭迎聖女。居止祖室。並立各守童貞。瑪利亞一入閨闈。益奮前修。若瑟亦感其盛德。心企躬從。斯固遂其相成之至願。而天主之所降諭益信矣。居二載。時瑪利亞年十有五。天主降生滿期。先遣一天神朝報之。向前呼曰。申爾福。瑪利亞。滿被聖寵者。主與爾偕焉。女中爾爲讚



美。瑪利亞已聞其語。見其容。驚而且異。天神復呼告曰。瑪利亞爾勿驚畏。幸獲天主福寵。將孕一子。名稱耶穌。此子乃大奇異。是必登皇祖達味之位。而建無限之基業。實係天主聖子降孕爾身。非世人比也。瑪利亞雖蒙聖諭。未達受孕何由。恐損厥貞。謹對曰。吾矢志貞潔。永避人道。所云孕產。將如之何。天神曰。此全不由乎人。惟由天主全能耳。天主既選爾爲其母。自能庇爾。爾又何虞。且不觀爾姻依撒伯乎。平生羸弱無孕。至茲耄矣。乃蒙主祐。已受胎六月。承天主福命。奚難孕乎。瑪利亞因信神語。對曰。主之婢女在茲。希惟致成于我。如爾之言。言訖定心。瞬息之間。天主第二位聖子。因天主第三位聖神之妙工。降於其胎成孕。蓋聖神以其妙工。聚



合瑪利亞腹中。淨血化成小軀。即賦之靈魂。即全人性。乃天主聖子接合之以己位。而天主性亦全在焉。此瑪利亞所由得孕。而實稱天主之母也。

瑪利亞既受天主降孕。靜隱數日。感謝至恩。因憶天神所言。依撒伯受孕之事。即偕若瑟往顧之。至門施禮稱賀。依撒伯遽覺所孕之子。自腹踴躍。因知天主降孕於瑪利亞有日矣。不甚忻喜。呼頌曰。女中爾爲讚美。爾胎子並爲讚美。我何人斯。敢當吾主之母。遠來顧我。爾德崇峻已極。是宜天主寶諾終不爾負。而眞福其必爾從。萬世之下。惟爾瞻仰不忘焉。瑪利亞聆此譽頌。益起謙恭。口約成章。告謝天主曰。吾魂現今弘主兮。而我心已踴于救吾之天主。



兮。蓋已眷顧厥婢之卑。由是茲後。萬代將稱予爲福者兮。緣大施子。乃全能者。聖哉厥名兮。且其仁慈。直至世代。及畏之者兮。使厥臂能。敗散傲輩。心謀之計兮。黜尊權者。離高位。而舉卑賤者兮。饑餒者。充之以諸祥。而富厚者。棄爲空乏兮。因念己慈。已援厥役。依臘爾兮。如昔示諭。與吾祖父亞巴朗。暨厥苗裔。至諸世兮。祝畢。依撒伯恭接入內。同居三月。乃辭歸。

聖母自受聖孕。聖若瑟猶未知其故。但覺聖母之腹日起。又明信其聖德純備。不敢疑問。躊躇弗慰。冀天主示之。瑪利亞亦覺聖若瑟心懷憂疑。猶自謙抑。不敢輕露。亦惟乞天主解慰之。天主果鑒其誠。即發天神臨聖若瑟之室。以其聖配受孕之妙功。夢中曉示



若瑟恍然大悟。益加敬順。嗣後事事聽命於聖母。頃刻不敢忽焉。迨聖母胎臨九月。產期將近。會西國宗王。以舊制令民各於所屬原府。報冊送京。時若瑟與聖母雖遇隆寒。道路修遠。兼值貧窘。然以生民急公之分。不敢違恤其私。即奉令登程。二聖在途。備耐諸苦。難以全述。冬至後三日。到白冷屬府城下。行旅充斥。無復餘次。姑就道傍一廢廬寓焉。是夜之半。產期已迫。聖母乃就靜隅。默思祈主。毫無苦難。遂誕聖子。譬之日光。透進於玻璃瓶。而玻璃如故也。是則聖母雖產。猶然童身。豈非終古絕無僅有一大聖事也哉。聖母視其子。不免色寒。心爲之動。輒包以舊布。權置於傍之馬槽。先盡臣禮拜之。繼因母情懷之。時若瑟目擊聖誕之奇。亦恪敬供



事罔怠。乃於誕生之八日。從古規行割損禮。即以天主所賦名耶穌稱之。耶穌者譯言救世也。以是知救世之功。其托根於苦與貧者。固若此。又越數日。有東國王者三人。見天際有異星浮空。其光絕大。適合古經所紀大主降生之兆。於是三王各離本國。各乘駱駝。望星而至。會於白冷府城。朝拜降生新主。各出方物。曰黃金。曰乳香。曰沒藥。貢之。咸述異兆。俯拜稱頌。聖母接見。不勝愉悅。即默自服領恒以自慰也。三王仰奉聖母聖德。多領慈訓。及獲見造物真主。釋除諸疑。久之方辭歸國。

於是聖母從古教規。居靜四十日。然後抱所生子。獻天主臺前。正登殿。逢一聖士名西默翁。一聖女名亞納者。各有默感。來迎吾主。



遂懷抱頌讚之。既而泣。謂聖母曰。斯子真救世者。然若正鵠。爲世衆所悖射。將來刃刺爾心。聖母聞言。銘刻五內。叩謝再三。旋懷耶穌同聖若瑟還家。居未久。有大患將至。主命天神。以夢示若瑟。言如達國君。名厄落惑者。傳聞誕生新主。恐致篡竊。下令白冷府界內。凡二歲以下。新生之男。將盡殺之。宜急奔他方避焉。若瑟即順命。夜起束裝。偕聖母抱耶穌往厄日多國。又冒風雨窘難之苦。益知凡爲天主所寵。主必試以艱勞。不一而足。即二聖亦恒以是念自愜其懷焉。既入厄日多國。人感聖母大德。咸敬愛之。始明天主降生之道。自後國中良民棄邪投正。甚至矢志精修。比比然也。二聖居此數載。黑落忒死。天神復引之歸國。



當時二聖與耶穌各執功業。無所欠缺。耶穌年十二。二聖守常禮。率隨國人遠赴公殿。瞻謝主恩。禮次。二聖隨衆返。耶穌獨後。弗使二聖知也。在途竟日始覺。以爲在同旅。與其姻戚處也。徧詢無有。於是聖母茫茫轉覓。復到殿中。時別耶穌三日矣。乃見端坐高士之中。答問經典奧旨。異之。徐呼告曰。吾子。爾何離我側。而留於此乎。令爾父與我憔悴。覓爾不已也。耶穌對曰。奚爲覓我。爾不識我天上父之事。我當在其中乎。言訖。辭殿。即隨二聖歸焉。嗣後經典惟記耶穌恒侍母側。聖母亦事其聖子。全心欽仰。法其精德。贊其妙用。餘未盡記也。

至耶穌年三十。宣教本國。周流四方。聖母時獲親視。會有親屬新



婚宴客。請耶穌同聖母往臨以福之。酌酒過飲方慙。酒忽罄。聖母見之。私告耶穌曰。酒無矣。耶穌陽答曰。此何預爾我事。然聖母默喻聖意。囑司席者。惟耶穌命。少頃耶穌令携數器。滿以清水。隨命變酒。酒即成矣。酒成主人大奇之。未詳其故。惟聖母及司席之役知之。因而徧傳之。此耶穌造聖跡之首。衆門人信從之始也。乃知聖母祈求聖子之言。必不虛負。以故後世聖賢。凡欲其意。易達於天主者。必冀聖母代請。鮮不負望焉。耶穌廣行聖化已三年餘。其自天降來。願行救世之美功。今當建立時矣。於是先辭聖母。悉告以將至之患。次聚諸宗徒。自迎苦難。聽許惡黨拘執。誣告妄鞫。備極凌辱。至釘十字架而死。時惟聖母堅持心志。隨處相從。毅然卓



立於聖子苦難之前。衷痛慄裂。向所謂刃刺爾心。茲驗之矣。故聖母雖則悲苦不勝。而既盡母情。又合子心。求救惡人之罪。絕無讐恨。容止岡愆。情不掩善禮。其永爲萬世瞻仰。宜哉。

耶穌既終。聖母偕宗徒治墓事瘞之。乃返城內。潛隱居哀。以候耶穌所許復活之期。第三日。果如所許。死中復活。來晤聖母。精光四射。迥異生前。聖母乍見。喜溢尋常。譬之蝕後之月。去其陰黯。復接日光。其輝映不倍萬乎。耶穌復活。留世四十日。諭宗徒傳教四方。雖隱顯靡定。其於聖母左右。時相與偕。且常叮嚀聖母。詳究教中奧旨。及明晰日後難知諸事。代勉門人。以所聞密訓造就之。迨耶穌升天後。聖母率眾徒集於舊堂。以候耶穌所許聖神降臨之恩。



十餘日。正當殷勤求禱。忽天主聖神托火舌形降臨於諸聖徒頂上。施以大恩。獨於聖母較羸倍萬不啻。錫施極其隆恩焉。

迨衆聖徒遵主命。出散四方。敷傳聖教。而聖母惟依聖徒若望隱潛於如達國都。斯時聖母神功課業。日益精新。愛主之心。慈人之念。日益懇切。或偕門人。詳布神訓。或在公會剖釋疑難。或提援弱者。或寬慰憂者。或責侈傲者。不使縱恣。或勵矢志者。不使惰窳。或遇閑者。親至耶穌向所棲止之地。覆視踪跡。追念其功德。因以大慰衷懷。而自利其靈。斯時也。盡國之境。無倫不沐其澤。無人不受其訓。遠近賢愚。親踈老幼。咸倚之爲師若母。諸凡溺惡。魔誘。慾攻之徒。與夫遭亂世。陷陋俗。而處危地者。但屬祈向聖母。未有拒却。



而負其望者也。豈不爲衆生之依歸。聖教之楨幹。禦魔之樓櫓。諸德之安所哉。以故四方聖賢。有不遠萬里。趨赴如達國。以求一晤者。又有聖母屢適他邦。安撫而訓誨之者。此又足徵其爲主布化之懇。救人饑渴之無窮矣。

繇是聖母精修至六十餘歲。親見聖教廣傳。耶穌聖名顯播。自歎曰。吾世願庶幾足矣。所歎者。面吾主與親吾子耳。是念日切。氣力日餒。惟展轉告禱不已。於是天主先遣天神。報以升天福音。聖母聞之。伏謝。然後傳示若望。若望傳之衆賢。未幾遍達國中。是時宗徒各居一方敷教。乃在天耶穌。欲顯異母氏神德。默使快頃環集聖宅。不速而至。不約而齊。及本國聖人。亦集其前。聖母視之。慶幸



不勝告衆以歸天之期。言訖。投身卑榻。旋顧左右。令近就以承其終言。因仰天祝告上主。大降福祐。使衆目就於聖域。以統率世人。迪於正道。次以和睦。互相愛讓。勸之。聖徒聞言。號哭涕洟。痛拜於地。而言曰。小子敢不各竭心身之力。如慈母聖旨。願吾輩藐諸孤。在此危世。無父可怙。又復無母可恃。奈何。聖母重慰之曰。爾父雖在天上。未嘗不臨格於茲。安云失怙。即吾或從主命。昇歸於天。自是亦將祐爾。又奚恃之失哉。爾輩哀殆過矣。辭畢。聖徒遂見耶穌。率無量數神聖。降迎之曰。申爾福瑪利亞聖母。若冬已逝。福春洊至。茲吾慈母。理宜離此垢地。而躋清天。爾居人中。常行神事。惟天國是懷。聖父重鑒之。故諸神亦從我來。迎歸本鄉。以登永定之位。



也。聖母獲聞聖子之音。且信且悅。乃端顏正體。仰天以掌合十字。言曰。吾乃上主卑婢。雖無功德。希惟施及於我。如主之言。遂如寧寐。吾主耶穌。乃引其靈魂升天而去。時正夏季望日也。謹按聖壽。從耶穌誕年。至茲四十有七。從耶穌升天。至茲一十有五。雖在世總數。諸史不載。而約之六十三歲云。聖魂甫出。耶穌接迎。指引升天。面拜聖父慈顏。於是天上羣神。前後左右。圍繞護送。述其功德。頌其靈事。且位之神聖之上。耶穌之右。其聖軀離魂之後。亦潤澤亦鮮秀。亦馨香。天神羣至朝禮。時設美樂。令眾聽之。致感爭敬禮焉。其眾宗徒。咸各爽快感慕。伏地瞻仰。依禮誦經。祝告畢。然後從俗。傳以香液。而謹殮之。是時遠近流傳。聖母升天。上土湧集。禱籲



不已。次日平明。聖徒親奉柩。赴葬熱色瑪尼山。有一凶人。於中途舉手加柩。欲推而辱之。天主輒顯其罰。令所舉之手。倏自斷而膠於柩。不得脫。凶人自驚異。刑痛悔求赦。聖徒伯多祿。默求聖母慈祐。令凶人自就所斷之手。命之復合。果然凶人偕大眾。共謝聖母之恩。墓禮葬訖。即以重碑封識其山。衆宗徒居守。三日夜無間。悲哀思慕之中。恒聞天神讚頌之異音。輒各述心中。最所仰異之功。德頌而和之。時惟多默不在。乃亦不期而來。於葬後三日。忽至。堅欲瞻禮聖尸。聚衆徒復啓塚。惟殮服空存而已。遂驚異而紀之。從是古今聖賢。確信聖母聖軀。僅入死域。旋蒙耶穌光照復活。即升天堂也。蓋是聖軀。即幸天主降孕。又以貞乳養育之。且畢世周旋。



之。載此異功。若使朽腐於塚。或久瘞於地。即不相稱。故於其甫完  
生死之道。上主即收之天國。俾合其靈。以享無涯真福。理之自然  
無可疑者。且夫聖母形靈既全在於天。凡我生民。皆有依倚。果堅  
向天國。慮無不得聖母之接引者。蓋天主於聖母。愛之至而尊之  
極。交以天上地下之權。爲萬民之主保。遂其救世之心。無求不得。  
是以聖人嘗謂聖教中人。正如百骸合成一體。耶穌其首也。聖母  
其項也。一身血氣。自首而下。未有不由項以相貫者。耶穌恩澤。皆  
由聖母以下及於世人。故聖經謂聖母爲天門。乃諸福賜所由出。  
諸善士所由進焉。然則修行聖教者。於聖母不仰慕。祈求可乎。又  
於其所當求者。不仰首望得可乎。



聖伯爾納鐸嘆謂聖母曰。世間惟未識爾慈。未蒙爾惠者。是即不讚爾德可也。其意蓋謂斯世斯人。盡在聖母慈惠中。或有未識未蒙者。乃陷於魔誘之人耳。又曰。凡入斯世苦海。欲免諸患。必仰此海星而後可。且或遭驕傲嫉妬之狂魔。投擲於山陰。或爲人欲邪俗之險浪。沉淪於淵底。以至感疾值讐。遇難溺罪。懷疑患乏等。皆仰恩母瑪利亞。哀呼聖祐。定獲允諾。將見無不克之難。無不勝之敵。無不愈之病。無不立之德。無不去之惡。無不除之患。而謂有求不與。有叩不應。未有之也。







聖母行實卷之二

聖母行實前篇所述。特其槩耳。茲復就古史所載。舉其最神異奧妙者。一十二條。詳著於篇。以起後世之欽仰云。

聖母爲天主無始預簡爲母

聖母既爲天主降生之母。則其稟受自異尋常。必爲天主所寵異無疑。蓋天主於無始中。自本自根。圓滿福美。及一切靈悟知能。渾然全備。極尊極大。無有窮際。首造天神。以爲侍衛。次造天地。生萬物。以備人需。又造人類。置之宇內。以享所有。待終世之日。登之天國。同享永福。固天主生人之初意也。奈何人類原祖。受生未幾。輒中魔計。叛恩方命。遂至點染原有純性。以至世世子孫。受其遺染。



於無窮。天主已先鑒及此。而惻然憫之。不忍遽絕。隨定後來。親自降生爲人。療人重疾。而救援斯世。脫於魔鬼之手焉。於時就擇定一室女爲之母。次其世系。立其名號。定其形質之美。性體之純。德行之備。及其生前生後。所建之神功。所履之聖域。以稱母皇之位。充至尊之職。皆已包含於其全體之中矣。凡此雖非人臆度可測。然亦即世情可喻而推。試觀夫人子之於母。無不欲其親族之富貴。形體之妍美。心神之明智。德行之昭著者。蓋緣子係母後。母之榮美。子與共之。惟憂力不能加焉耳。若吾天地真主。既以至靈徹萬理。又以至仁周萬物。并將來之母。亦係其所造。安有不使之克備內外諸德之全乎。倘若天主之靈蚤知其母之宜尊貴。又蚤知



而不肯加。是天主之愛其母。反不人若也有是理也哉。古聖設有一譬。更加明焉。帝王開國。擇地立都。必先精擇一域。以建宮闕。其基址必欲深固。棟宇必欲崇隆。內飾殿庭。外開苑囿。備極壯麗。蓋以至尊御於其間。不如是不顯其尊且貴也。今造物主。爲王之王。爲尊之尊。無耦無對。將降下土。建精修於神國。其自營之宮闕。固即室女之胎腹。有不畢顯其尊榮者乎。矧帝王建闕。必先良師集材。羣工削墨。方能盡美。若天主則自運神工。不借外力。不待時刻。凡宜造作。是欲造作。凡欲造作。是能造作。初無礙阻。則從無始而預定其母之聖德尊榮。豈人所能測其萬一哉。是以古今聖哲。皆曰。天主於將來。所播一切美行奇工。上之天神九品。下之諸聖萬



善。皆約賦於其母之聖躬。使其後爲上下神聖之母主。實德之明鑑。精修之表儀。榮福之統會者也。蓋天主至尊無尙。則其降孕之母。亦至尊無尙。自應超絕神聖。如天懸絕於地。猶未可比也。

聖母蒙主寵福豫證

或曰。天主從無始。自定降世救人。幸聞其義矣。但天主凡有所造。悉由自主。欲作便作。何必預爲之計乎。答曰。凡從明悟有造作者。未有不預定規制。而先經營之者。是以營室必先定基。鎔金必先定冶。况天主乃明悟之首。其經營豈獨廢哉。則從無始自定降世。亦從無始預擇其母。寵福之。此理確然。無可疑者。又嘗考古經天主初造人類。命之守誠福享。乃隨中魔誘。天主遂加之罰。因其有



原罪。傳染後世。主欲援之。即向魔曰。汝方我命。而誘感人族。吾後必令一女。偕其胎子仇汝。令其足聶汝頂。汝即欲微傷其趾。而弗可及也。所謂一女偕其胎子者。古來聖傳。咸指聖母。偕所誕聖子耶穌云。蓋聖母既絕原罪。又從生時。載有聖德。故克仇魔而足聶其頂耳。從是天主始詳立聖母世系。於其間。多生聖人。默示聖教將來種種奧旨。令筆之經典中。據經先聖母生千餘載。天主立一聖德之王。曰達味。甚寵異之。即預定爲福女之祖。於是聖王得以神目豫見。且朝賀之。吟咏讚頌。至謂天主曰。嗚呼。幸哉。見我皇母。立爾左右云云。又王之子撒落滿者。亦蒙主聖寵。賜以大智超絕古今。亦幸預見聖母福慶。而與之言曰。吾自無始。受簡於主兮。天



地未位。山海未奠。吾已孕於上主之明胎兮。造物者。其將轉降於我腹兮。汝係雅各大聖之裔。而從我所寵忠貞之世族以生兮。嗣是又二百年後。有名聖意撒依亞氏。預知聖母景誕曰。造物主將以來世彰厥隱旨。令一室女。無人道而生子。又一百四十年後。聖熱肋彌亞者。繼宣先聖之訓曰。至慈吾主。將造絕大奇跡於此地。有一童女。腹懷一士焉。所謂童女。聖母是也。所謂一士。天主耶穌是也。蓋耶穌在母腹時。雖係嬰兒。其所含明智絕大。超諸庸人。故比之士耳。嗣是如達國。世多聖哲。正道相傳。無不預言聖母及其聖子將誕之奇。數千載後。果驗若合符券。無絲毫爽。足證前論。聖母從無始。蒙選於天主。亦自不得不然矣。



聖母始胎

天主造成天地後。四千餘歲。若雅敬及安納夫婦。賢而無嗣。恒以誠心祈主。主遣天神。報以將生淑女。未數日。安納果福孕。上卷已載其槩矣。茲復舉聖母始胎。詳其隱義。內含奇妙七端。一曰世族之奇。自古如達國顯族有二。一治國者之世族。一司教者之世族。二族原係天主寵異所立。均爲達尊。分位相別。彼此婚媾。世相繼也。以故天主欲顯其母生誕之榮福。乃令從二族胎之。此一奇也。一曰二親衰耄之奇。按上卷若雅敬安納夫婦。老而無嗣。顧賴主庇。靡敢絕望。懇祈不息。終獲所願。推此則知聖母始胎。非人性力所及。惟得之天主全能。滿聖經所載。生自老親者。有三四聖士咸



天主所簡在每寵異之。使建大功。宣聖教於宇內。因知聖母生後。所建功業。更非諸聖可比。則其始胎。尤徵天主寵異之至。此二奇也。一曰無原罪之奇。依聖教定論。凡由人道受生者。雖二親至聖。其始胎時。靈形交合。悉染始祖方命之罪。所謂原罪。是也。染是罪者。性伏惡慾。於是疾病夭殤。凍餒憂患。危險凶惡。種種苦萌。因之。且迷溺於惡。如水就下。獎進於善。如石升上。應難者反易。應易者反難。是皆原罪所致。無可解免。獨聖母從母始胎。即蒙主以全能庇之。絕無夙染焉。古有熱肋彌亞若翰二士。亦於母腹。獲免原罪。然先已受染祖累。後始蒙主祛除。加以聖德耳。若聖母初受生時。使已無染。蓋聖母之身。日後將爲天主殿宇。倘少頃受染。辱必逮。



聖子之躬矣。於義安乎。以故聖經讚頌聖母。或比之全瑩無瑕之玉。或比之至明無塵之鑑。或比之蕃茂無棘之圃。或比之至潔且清之泉。又諸古聖咸謂原罪。爲聖母之所絕無。蓋聖母光榮。非天上神。世間聖。所可比。且天主向責魔云。後世有淑女足聶汝頂。尤知聖母必無元染。蓋邪魔所以誘害人性。漸溺於萬惡者。惟此原罪。倘非聖母始胎。原不受染。何以足聶魔頂。而絕其引致諸惡之累乎。此三奇也。

一曰形靈之奇。聖母二親。旣以聖德與偕。悉軌於正。絕無私慾。又蒙天主寵異。加於神力。則其所生淑女。形體全美。無以復加。非古今世人可比也。蓋外司百體。併兼萬秀。各得其所。分毫無歉。所以



終身安和。無疾厄也。若其心魂最靈至善。尤爲無比。蓋凡人始孩。形質以漸而長。知能亦以漸而充。未有始出母腹而即成全者。惟聖母始胎。靈形內外。渾然全備。而內三司之美。遂顯其用。盡其職。而無需漸次焉。先聖有曰。天主亘古所賦諸性之奇妙。皆約置於其母性內。蓋言聖母靈形之異。超絕衆聖。包含萬美也。又有云。凡靈形之奇妙。人可得於主。主可賜於人者。必悉賜於其母。而其母必得之。理固然也。此四奇也。

一曰慧捷之奇。凡人在胎。必待體質既成。始受靈魂。以全人性。又靈魂雖備。明愛記三司。亦未能遂施其力。須待生後。外司略全。然後內司之力。方漸克施。乃聖母於始胎。即蒙天主異寵。其體質之



粹與心靈之妙。遂并昇之。無待出胎。而已明所當明。愛所當愛。記所當記。如太陽未出地平。光已圓滿。甫出而萬物咸照焉。以故當嬰女時。以司明及司愛之力。即獻其靈身於主前。願充役使。又且始立高志。終身恪守童貞。即以超絕於諸往世之淑女。表主異寵焉。從是神功綿密無間。日加精進。畢世勤修。蓋其未出母腹。而靈修己全矣。此五奇也。

一曰定善之奇。聖教中比論聖賢之德。譬之月焉。有朔望盈虧。明晦之異。變而無常。雖主或鍾愛。定其志於道德。然未免或蔽於取舍。而有出入。惟聖母獲主殊寵。其始胎。即篤向於主。自甫生以迄乎終。恒常於善。毫無遷徙。經述聖母始胎之言云。吾主於造我之



首功。即加我護持兮。蓋聖母從母腹。自獻爲主之役婢。遂蒙護持。自定於善。永不能更易也。此六奇也。

一曰靈形和合之奇。世人始生。既染原罪。并受其罰。且人之靈。每叛主命。而其形。復自逆其靈命。故聖經嘗云。夫靈與形。恒相爭逆。而不和也。若吾聖母始胎之初。獲免原罪之累。而又加以諸聖德之寵。故其靈神。伏順於天主。而形體。伏順於靈神。既無悖逆。又無強勉。以故靈形最和。相親相助。非他聖人可匹也。此七奇也。要是七端。不過聖母始胎恩寵之大凡耳。若欲詳測他端。其理甚奧。未易及也。



聖母生誕

聖母在胎。亦滿九月而生。但其生。不致母有產患。蓋始胎既免原罪。則原罪所遺之痛與汚。自宜并免。是知二親之慶樂。非他人比矣。以平生所懇祈。所切望。蒙主所許之淑女。今始身親見之。烏得不喜。雖然聖母之誕。匪第私室之榮。於天上神品。於天下萬眾。大有一關係。有公幸公樂焉。茲請畧述其所以然。天主初造天地。并造無數天神。以爲侍衛。共享永福。其間一神首傲叛主。從之者幾半。主遂盡貶爲魔。驅之幽獄。嗣是制生萬民。約期升之天國。以補叛神之缺。仍令享神福也。於是邪魔妬嫉人類。便欲陷人於惡。令其共墮幽獄。同彼苦難。而後快。以故亞當始生。輒誘反命。然天主至



公至慈。以魔之叛主由己。人之叛命由魔。天主故嚴絕叛神。而不忍絕叛人。因於天上善神。預示後日降生救人。補其侶伴之仁旨。由是善神九品。一觀天主所擇母氏之奇誕。即知天主所營巧妙。指日可見。忻幸無已。仍欲發現其樂意。聯翩來降聖母之室。一朝慶。爭相讚頌。聖經云。天神見罪人悔過遷善者。必喜必樂。况始見聖德之女。將爲罪人之藥室。善侶之援引乎。至天下之人。其品凡三。一謂古往諸聖。二謂見存諸聖。三謂見在及將來罪人。論其首品。天主降生以前。古來聖人。雖當應榮福報。但緣始祖債負未償。升天路隔。非天主降生受難。盡贖世罪。未有能通之者。姑置古聖之域。以待天主降取。故其控求希望。甚懇甚亟也。及忽聞天主



所擇母皇既誕。即不勝忻幸。正如繫獄者。幸聞納贖。而出獄之期。近矣。其頓慰往日之苦。喜可知也。論其二品。則宇內見存聖賢。或由聖經。或聞先知者。所述天主降生受難。以贖人罪。啟天路。真實不誣。故居平禱求。望其如期而至。滿成救拔之功。迨至聖母生誕。蒙主默照。皆知爲恩主之母。則其喜幸。何如耶。聖經述言若翰聖人。將爲救世者之先驅。當其初生。且致親隣喜悅。乃主之聖母誕生。所致福樂。於其宗族親友。及一切聖人者。不更倍萬哉。論其三品。凡竄流此世。悉受世染。溺於非義。聖經云。義士一朝猶七仆。況其下乎。夫罪猶瘟疫。非速治。必就斃。又人力皆溺。不能自振。去垢改非。底於正道。苟非萬民慈主。憫恤提拔。更無所望。乃慈主匪徒。



決志親降。以振人患。又選擇一聖德之母。立之宇內。令爲諸善之表儀。及諸不善者。圖改之庇蔭也。則聖經稱爲罪犯者之歸宿。患難者之怙恃。疾病者之藥室。正是之謂耳。然則世間一切罪人。患人。因其生誕。其幸喜之至。亦可測也。譬之病於夜者。終夜呻喚。頃刻難度。幸聞啓明出顯。便測日光不遠。乃自慰其憂。病亦從此漸消矣。聖經嘗喻聖母於明者。以此也。則凡在患難苦者。聞此吉音。自慰慰人。喜樂無已。喜不然乎。是知聖母聖誕。天上天下無品不樂。惟冥獄中之邪魔。反惶恐悚懼無已耳。蓋從魔初誘人時。天主即有淑女足聶其頂之語。今果見誕生。能不畏怖乎哉。是故後聖頌稱曰。夫聖母之始生世也。虜者獲歸。病者獲治。罪者獲赦。憂者



獲慰於善人加寵福於天神加慶幸於天主大顯其榮及無際之  
功績以故天上天下無品不歡樂之又謂聖母童貞之表率正教  
之楨幹登天之階梯乃天神所樂鬼魔所驚也而約萬言爲一言  
亦曰天主三位之光榮已耳

聖母童貞

天主自造人類之始定愿降世孕一室女潔胎使雖產誕無損童  
體慮世人愚陋難信未免致疑乃多端設像引喻上古聖賢令其  
知之明信之篤然後書於經典垂券萬世後有聖人詮解以著聖  
母寵福其卒世童貞誠有必然而無可疑者蓋太初天主責魔之  
語所謂日後一女偕其胎子仇汝而聶汝頂者明許天主聖子降



生之事。獨指其母而不指其父。以示降孕不由人道。而以童貞爲母也。嗣是天主詔古聖名美瑟者。以將來微妙之旨。訓誨下民。時於山中牧羊。忽覩荆棘一叢。發火大焚。然終不燬。聖人奇之。欲近審其故。忽聞天上有聲禁止之曰。勿近茲。茲乃聖地也。美瑟記其異。後有聖人註曰。焚棘叢不燬者。正指聖母孕生天主。不損其貞也。未幾天主擇立聖人之兄亞隆者。司大祭。因欲使民敬信。默照聖人取樹一枯枝。置主臺前。其枝倏茂盛吐花。衆奇之。遂共戴之。而聽其訓。古今聖註皆曰。枯枝者。室女也。枯枝茂而吐花者。乃室女無人道。而產耶穌也。蓋古經中嘗稱聖母爲熱瑟巨家之宗枝。稱耶穌爲枝所吐之美花也。又後數百年。有先知之聖達尼葉耳。



者。誌時王之夢。最高岑有小石。無人推移。輒自墮毀。其下金銀巨像。聖額我畧註曰。最高岑者。指聖母德之峻極。超眾神聖之德也。無人推移。小石自墜者。指耶穌神力。自脫母腹。不費其母之力也。石小而毀金銀巨像。指耶穌以謙卑之道。摧挫邪魔之傲盈。及世間所崇異端之像也。聖經中如前章。比聖母於封泉圍園明鏡。蓋封泉者。指聖母潔體無損。雖有生產。如泉之封。恒清不汨也。圍園者。指聖母如園生花。不受外患。明鏡者。指聖母貞體完全如故也。是後又有名。聖葉瑟几葉耳者。天主啓其神目。見一絕奇大殿。殿中東門獨闔。天主諭曰。此門亘古未啓。蓋惟主過之故也。聖奧斯定註曰。天主明示聖母產前產時。及其產後。常實童女。分毫無損。



童貞。蓋天主既於降胎時。不由人道。則出胎時。自顯全能。益加榮  
福。正是太陽之暈。進出於玻璃器。彌增輝光。匪直無污無損也。即  
終古先知者。熱肋彌亞。與意撒依亞二聖。預云天主於來世。將造  
未經見聞之奇跡。必使室女懷孕。且產真主。倘若聖母於孕時。或  
產後微玷其原貞。則亦何別於諸婦。而天主亘古所許。未經見聞  
之異跡何在耶。蓋天主降生。必欲顯其實取人性。真從女胎而出。  
又欲著其本性之全能。雖降生於女胎。而必令其原貞不損也。况  
天主降世原旨。肇立童貞聖範。自欲偕母氏共爲世表。豈以童貞  
之主出胎時。反致損童貞之皇母耶。又遣天神預報聖母以天主  
降胎之意。聖母對以永矢童貞。孕何自受。時天神以不由人力。惟



從天主妙功等語應之。達味聖王於千載之前。預諭此天主降生神功之妙。托喻曰。上天降露下地。應產救世之主。可見聖母。悉不由人力。獨承上天之潤澤。而生產耳。由是近古大賢。偶聞時士。有疑聖母。終身童貞者。即迎諸途而謂之曰。學士勿疑。聖母產前。以童身受孕。吾棍所指。立有明徵。言訖。以其棍叩地。地即應棍發出奇花一枝。次復告曰。學士勿疑。聖母產時。童貞不損。叩地如前。乃奇花再見一枝。又次復告曰。學士勿疑。聖母產後。猶然童身。至終無染。復叩如前。而奇花第三枝發矣。見者甚感其奇。於是恭敬天主。明旨。確信讚頌聖母之貞潔不止也。以故前後聖人。悉皆篤信誠慕。無敢置疑。以致瀆者。蓋信聖母於受孕時。悉無人欲之樂。因



至產時。悉無痛苦之汚。蓋樂痛二端。於人生產相因。今既無此。則亦無彼矣。此聖母之終身童貞。萬無可疑者也。或問曰。天主子受孕。既不損其貞。何以徵爲天主眞母乎。曰。凡人必由父母二人而生。是生之功。必分於父。而母僅得其半耳。天主降生。以其妙功。獨注於母。則其爲母之義。必獨眞切。設微有損。則與人母無異。何以稱天主之母哉。是以自天神朝報以來。聖教尊信天主聖母。卒世童貞焉。

聖母精修

精修之義。成以兩端。遠惡行善而已。茲舉遠惡言之。聖母從母胎承主寵福。絕免原罪諸染。故教中聖人。凡論人世所冒罪過。不論



巨細。聖母一切無有也。請詳證之。罪愆萬態。約歸二種。或有不善。或乏善。或不宜爲者爲之。或宜爲者不爲。一謂背違。一謂欠缺也。聖母不但無背違之跡。併無分毫欠缺焉。蓋凡缺於善者。概由三端。一曰。心思不覺。二曰。心志不及。三曰。德力不足。人性初染原罪。明司己受蒙蔽。其於趨避之宜。謬迷不悟。由是愛司。遂失正指。即偏於私。屢陷於非義矣。且人性既失其正。則并失慈主所賜行德之資。而懦弱不能自立其常也。至於聖母所有性情。至絕至粹。渾然全備。其靈才受主寵照。本分之事。超性之理。無不洞晰。非特無迷誤。無有猜疑。即不覺不思之缺失。亦所不容。由是聖母明司既瑩。其志與力。自然全遠於惡。無纖染焉。是諸聖所謂一念之蒙。一



言之苟一動之愆。一情之戾。聖母自生迨歿。非啻絕其形跡。且絕其端微焉。以故聖經讚稱聖母爲完全美好。譬之盈滿之月。晴朗之日。明瑩之鏡。無茨之玫瑰是也。乃究其所以然。天主旣選爲母。尊無上矣。愛無對矣。天主旣全精粹神妙。則次天主精粹神妙者。聖母也。豈宜纖毫微失。稍染於世塵哉。借令聖母猶有所缺。或不知焉。則愚知而不能則懦。能而不肯。則不仁。愚懦不仁。豈天主所擇以爲母乎。故上文所述。近古聖人咸稱聖母。終身絕無缺失。信矣。此聖母遠惡之精修也。至論行善之精修。乃愈難述焉。試揭其畧。德之宗品有七。其三品。使人正向天主。曰信。曰望。曰愛。緣非人力自致。乃賦自天主。故謂超性之宗德是也。其四品。使人節制生



平之事。以至其所當至。曰智。曰義。曰毅。曰廉。是則雖賴主祐。亦係人力漸積之功能焉。

略言聖母信德。有三可徵。一曰天主以無始無形。全福無缺之聖性。將合有始有形。屬苦屬死之人性於一位。以致上下懸殊。二性之名號相通。正謂天主。并謂人也。一曰是天主性與人性。將合於一室女胎中。令其受孕生誕。仍爲童女。不損其貞。不汚其潔也。此二端也。亘古聖人以爲最奇最異。非人思慮之所及。乃聖母一聞天神報示。當即篤信承之。即此信之之功。超越前後諸聖多矣。三曰天主以所取人性。至受無數苦難。被釘十字架時。見在聖徒。無不驚疑。獨聖母時侍聖子之側。毫無惶惑。實信是諸苦難屈辱。正



聖子擇取。以贖萬民罪債者。是債酬畢。人性復立。始全聖子降世之功。由是聖教共相讚美。以爲諸篤信者之母。蓋以信德如聖母無以尙之。

次言聖母望德之妙。約之有五。一曰原許童貞。雖有受孕生誕之功。全托主祐。望其必如所許而不負也。二曰聖母當若瑟疑其受孕時。緘默無言。不急急釋其惑。以白己潔。惟望天主因時指示。默賜剖析也。三曰聖母偕其聖子。宴於姻家。忽覺酒乏。即懇濟於聖子。雖應之以冷語。自知聖子必不負其所望。竟囑役人順聽主命。旋致清水數器。倏變旨醴。四曰耶穌受難後。宗徒及諸門弟。雖聞天主明許復活。未免爲禍患所搖。無不失望。獨吾聖母心志堅定。



不疑不變。專望聖子踐諾。幸首覲其復活之慶。并蒙其首照之恩。澤也。五曰。聖母又實望聖子。必保存其身體。不使生前。染於世垢。豈肯使死後。損於穢土。卽以形靈之潔。全登天國。偕其聖子。承享無際永福。而卒無不如望也。

至其愛德之妙。則更難言。聖母愛慕天主於萬物之上。寤寐動靜。飲食語默。瞬息罔間。形靈之能力。無時不致其極。而自視尙如不及也。又妙在愛主心情。時加擴充。每極其功。彌倍其力。正如巨火增薪。勢愈熾烈也。由是名聖嘗云。聖母仁愛之聖火。燃烈於心。終身不熄。直罄形靈之力。至其已故。其靈尙飛天上。繼積其功。不使少斷也。蓋諸德之功。與身偕息。獨愛主之功。非但與身弗息。身後



更精且全也。耶穌宣教時。曾云愛友之實驗。無切於爲其所愛。甘心冒苦難。以致其命。乃聖母凡聞聖子苦辱。必趨其側。頃刻不離。以故聖經喻聖母愛主之誠云。萬苦之海。未能滅其至愛。世火之大者。遇水長力。仁愛之切者。遇難倍篤。此乃聖母三德之略也。再論聖母後四德之妙。一曰智。智者。言行無失。以觀聖母。其言必寡。而時約。而旨實。而無虛。謹而無忽。其行則儼而不斃。勤而不怠。凡有事所當由者。必竭志精誠。以底厥績。未有不終事者焉。以此驗之。而聖經嘗稱聖母爲至智之潔女。實不虛矣。

二曰義。義者。所行合宜。聖母義德之妙。首在敬慕真主。每以主恩甚多。恒圖報謝。因時獻其形靈之貞潔。即悅主心。以盡其欽崇之



誠未之或間。至其所以孝親弟長和侶體下扶弱救乏恕侮慰憂

援溺恤患。一切愛眾實功。無不盡心竭力。以致其精粹。不能殫

述也。

三曰毅。毅之爲德。不爲逆屈。不爲順縱。中立自持。不移不變也。茲也逆順二境。徵聖母毅德之妙。境之逆。莫過聖子受難時矣。蓋耶穌備有全能全德。極宜愛慕尊敬。惟聖母知之最明。愛之最篤。乃忽覩其橫被屈辱。倍萬苦楚。以至懸死於十字架上。無異寇盜。則慈母心如刃刺。直應痛死。而聖母於是時。全不驚懼。非但不屈不亂。且操大節。以慰宗徒。絕無一色之變。一動之愕。又侍聖子受難之側。願偕痛苦。雖至致命無避。又當極苦時。悉忘己身。惟依聖子之心。思所以救害聖子者。懇祈天主恕赦不罰也。是可推聖母心



志之堅毅。必爲古今人世未見未聞者矣。至論甚順之境。又孰過  
聖子之復活乎。當其時。耶穌於古聖所中携出。往古聖人。從此升  
天。以受福報。畢救世之大功。爲天上天下神聖之共主。此固莫比  
之榮福。他人處此。所喜無任矣。而聖母以志之高。德之確。善定其  
情。安若自然。毫不至言動之矜詡也。斯其毅德。至矣極矣。

四曰廉。廉者。節制嗜慾之德也。聖母廉德之妙。從生迄歿。無時無  
事不著。自初始母胎。首誓終身童貞。而以形靈之潔。懸絕諸神聖  
矣。至其內外諸司歿世。於非禮之失。不容纖渺。其日用之需。甚寡  
甚粗。僅足存命。不致飽飫。又屢守齋戒。一以悅主心。一以精己功。  
一以保人罪。其寢寐常如醒寤。不問神功。不負光陰。衣裳質潔。不



文不飾。親知非不得已不往。至其威儀。與其謙和。每致人嘆異。敬慕如神聖之正表焉。是以伯納篤名聖嘗云。聖母真正之萬德。以貞爲冠。以謙爲藩。由貞蒙天主異寵。由謙蒙天主降孕。由貞超絕衆神。由謙自屈衆人。以故至公天主立之爲母。冠之諸神聖之上。非過也。宜也。此則僅表聖母聖德之萬一。如天漢一星。滄海一滴耳。蓋聖經頌稱聖母大德之文美。獨指其外。至其內所蘊蓄。神妙淵微。古今聖哲咸以爲不測。又何能言乎。惟有默敬而仰貴之耳。要以萬德森羅。未敢覩縷罄也。

聖母聖績

聖母精修。上章畧述之矣。茲釋其所成之績。然非人世建功之規。



所可推也。惟就經典及聖賢所傳。或可測其萬一焉。凡功績之實者。根於人之性情。而成以主之寵祐。人性所以始功績者。惟恃明愛二力。彼痴愚狂夢之動。無與功罪者。以非出於明與愛也。明力愈精。愛力愈強。功德之積。愈速愈實矣。但二力以原罪致傷。靡能自立功德。仍賴主祐。補其不逮。由是天主凡擇一人。以建異功。必先賦之以美質。次加神智於司明。加聖德於司愛。又去諸碍滯。賜諸資藉。時相左右。竟致成功矣。聖母既蒙預簡。以充至尊之位。立至高之功。其所加寵祐。使獲盡職而全功者。宜更如何。是以教中聖哲嘗云。凡天主所可予天神及世人。與夫神人可受於天主者。天主已予其母。而聖母已受之無遺也。又云神聖功德之盡境。乃



聖母托足之始基。然則聖母功績。至精至大。非思議所可及。非口舌所可述。姑提二三端。以概其餘。可也。

一。聖母一功。并通諸功。蓋實德恒相因。弗能相離也。且聖母德行。必向於極精極全。而精全非諸德之總域乎。蓋其神智最明。神力最厚。愛敬之心極殷。天主之祐極備。則凡矢志於善行。必不止一德之偏。實萬德之全焉。

二。聖母功無間斷。諸神聖雖蒙天主異寵。然以稟性之弱。及德之分量有限。求其純常嚴密。功無作輟。不可得也。惟吾聖母從始胎。以迄終日。曾無瞬刻之或閒。故聖經指聖母神功之妙述。其自語曰。吾身即寐如息。而心實寤。而未嘗息也。



三。聖母功無止極。聖賢論聖母。凡日用行事。雖最陋且小者。亦必矢志精深。求合主旨。以悅其心。酬其德。即盡致靈身之力。猶歉然不自知其功也。蓋聖母既洞徹天主無際之妙性。自應愛敬以無窮之至情。即欲不如是有不可得者。乃其愛敬之情。愈長愈熾。於是天主酬以新寵。倍其神力。乃聖母又以所得新寵神力。復致虔修。益以新功。倍其前功。如是日新日進。百倍其功。以至於至。故聖人嘗曰。天主與聖母。若爭兢然。天主以寵授。聖母以感受。天主倍其祐。聖母復倍其愛。如此越加。恒無止極也。又曰。舉天神聖人。從生至終。所建功績。較之聖母。猶勺水之於滄海也。又有云。聖母一愛之情。必勝大聖人終身所建之績。故聖母之績。非可殫述。惟天



主知之而已。

聖母升天

聖母始生。即蒙天主異寵。則告終日。必享殊福可知。蓋始終生死。無不相應。初生之奇妙。即善終之福兆也。矧始生之時。行猶未修。功猶未立。至若終日。精修功績。既極其所應得之寵榮。較始生不更甚乎。聖經云。聖人終日有榮於主前。以聖母功德之至。冠絕諸品神聖。則終日之榮。又當如何哉。余於上卷中既詮其畧。茲特揭數端。補所未及云。

一曰。聖母素有升天之願。世人之情。戀生忌死。蓋以生爲吉。以死爲凶也。乃若聖人。悉知世苦。非其本鄉。故視死之日。反如始生之



年。非特無忌。尙懸望而忻慶也。聖母從始生。已領天主之諸恩。其洞悉世苦。及天國真福。比諸聖人更徹。其欲親臻其境。永受福照。無時不然。故亦無時不用祈禱。迨聖子歸天之後。其情更殷。面覩聖子之願更熾。祈禱更懇。正如火焰升天。彌近彌疾。亟欲獲本所而永安也。但惟念茲聖徒。或以己之在世。有所補益。則又不敢自便。而謙對天主曰。主之婢女在茲。若欲畱此。以益聖教。或慰門徒。曷敢辭勞求逸。如其不然。婢女之所切願。吾主知之久矣。敢復說乎。是知聖母愛主之心。與愛人之心。並爲切至。獨忘己私耳。天主豈不鑒其衷。而遂其願乎。

二曰。聖母終日蒙主躬迎。蓋天主感聖母祈願之誠。仍遣天神嘉



庇厄爾報以升天之吉音。次令聖徒。或遠或近。一時畢聚榻前。即其餘隣國諸徒。聞之無不趨赴。以致其尊敬之誠者。諸聖已聚。乃天主耶穌。率天上眾品神聖。降臨其前迎之。蓋以盡其仁慈之極。顯其升天之榮也。嘗查古今實書。天主於名聖終日。屢親降迎。登之天域。又聖經嘗述耶穌歸天時。慰聖徒之言曰。爾輩勿憂。吾茲升天。預備爾座。日後將來援爾同升矣。夫天主寵愛聖人如是厚且切也。矧於聖母。其寵愛不倍萬哉。

三曰。聖母終時。不受魔怖。世人垂死。邪魔屢至其前。誘以不義不潔。意欲溺之冥獄。同受無涯苦楚。蓋魔性素嫉人福。見其將終。惟恐計無復施。以故乘機肆虐。無所不至。乃聖母則自始胎。蚤已足



躡魔頂。且諸德純備。終身毫無缺漏焉。是時又有天主耶穌來迎。及眾神聖左護從。魔計雖巧。亦何由以施其術乎。

四曰。聖母終時。絕無病苦。世人始生。因其所稟氣質。勢必由穉而壯。由壯而消。消則漸老。老則漸至於終矣。其間病苦相尋。迄終不免。此蓋原罪致然。無足怪者。若聖母既蒙主寵。盡免原累。雖年逾六十。生平絕無病苦之端。及聞天神報以升天之期。其愛慕聖子之情。如火益烈。百倍熾燃。潔靈莫逆。因遂飛升矣。故聖師確論云。聖母聖軀。一因天主隆佑。一因原稟至粹。未嘗違和染疾。其終時。雖變化於聖愛之火。正如馥香一藝。而即上升也。

五曰。聖母終時。亦無憂懼。凡人入世之日。定即出世之期。是死乃



人所不免也。顧人生時形靈相結最固。相眷最密。故至其相別。不能不哀憂。不慘痛矣。矧有憚畏死後之罰。胡得不驚惶耶。若聖母形靈兩端。各具聖德。以故相別之時。恬然自適。無所顧畏。經云。有德者之靈性。蒙主救援。死時痛苦。終不之及。况聖母預知形靈。雖則暫別。未幾復合。承享天上無限之真福矣。又何憂懼之有哉。

六曰。聖母聖尸升天。聖體離靈之後。鮮澤馨香。致生遐邇諸聖之愉快。天神降臨。慶禮設樂。三晝夜不絕。至三日後。聖軀復活。直升天。復合原靈。蓋聖母既終身貞潔。立聖德之表儀。其尸本不宜久留垢泥中。并被他端之損淤。况其潔體。既爲天主所胎。歷時九月。不爲不久。又豈宜久係塚中。不幾辱及聖躬乎。又天主復活時。并



賜往聖肉身復活。偕升天國。夫聖人於天主下臣也。且猶優待若  
是。豈待皇母。反出下臣下耶。由是古今聖人。篤信聖母肉軀。蒙主  
恩復活無疑也。其必三日係塚而後復活者。一踐聖子之跡。二驗  
身死之真。三待未至之聖徒。使親視其神澤耳。且其升天不賴他  
功。直托聖子福力。自升向天。以故經述。天神於千載年前。奇訝聖  
母升天之景榮。相問曰。夫仗其所愛之主。從野土升天者。斯美女  
其誰乎。觀彼天神羨慕於前。則聖母終時。所蒙主寵之妙奇。不更  
可想哉。

聖母天福

聖經嘗云。天主所備天上諸榮福。以酌慕己之聖人。悉人目所未



見耳所未聞。心所未及測者。蓋天主至富無缺。至慈無私。以故酌人功德。無不豐厚。厭飫人心。盈滿願欲。况聖母勳績至極。超絕諸神聖。而天主酌之。又豈言所可述。心所可通耶。茲畧指其影。令人想像其萬一云耳。

一曰。古今聖師定論。謂聖母天上福慶。即併諸神聖所享。猶不足比焉。蓋天上之福。正應生世之功。聖母生前所績功德。合眾神聖無可叅較。則其相應之福報。亦必懸絕不啻矣。經云。天主舉聖母於九品天神之上是也。又有名聖喻曰。聖母所享天福。兼含諸神聖所享之福。猶日之輝光。絕勝諸星。而一日之照。明於萬星之照是也。經中又載若望聖徒。幸觀聖母在天受福之景。嘆曰。日光爲



衣明星爲冠。朗月爲臺。因示神聖之福光。總以彰著聖母之榮福。且猶不可比其萬一也。

二曰。天上之福。必由明愛二力致之。蓋人生所積功德。必由二力。則死後應功之福報。亦無不以二力致也。茲畧詳聖母明悟之司。大蒙福光之照。朗然明徹。天主性體。及其性內之妙景。蓋天主性。兼含萬美好之妙。聖母旣明識之。由爲真福之根矣。故聖經謂天主云。福生之機。必在於識爾是也。乃聖母由是福識。又明徹千古。人物之性情。及所將生造之效。以至無窮。是則聖額我畧。所謂人之靈魂。幸識造物主。又何物不識耶。况聖母旣蒙天主。取爲萬民恩母。可不明其所掌之屬。以施惠澤。理其事而振其患耶。以故由



是福識。自然明徹古今。萬民所思。所言。所行。及密隱諸情之動。又識造物主治人靈之奧道。及萬民改惡修善。入聖域。登天國。秘密之因也。蓋此種種物理。與神人之諸情。最有關於聖母之弘權。自應通徹而詳晰之。因是而推聖母。非止明識。天上天下。神聖人物之隱密諸情。即或人於聖母欽仰之。憶念之。或禱其祐。頌其功。謝其恩。凡與關係者。亦無不明識之也。由是又知聖母福識。甚廣甚深。獨次天主耶穌之識。而冠諸神諸聖之福識也。其愛欲司。依司明之福照。更得慈主之異寵。不得不致其愛慕之極。故其所享慶樂。無可言喻。蓋司愛。既隨司明而行。則司明於物之美好。透之愈徹。司愛必愛之愈至。因懷之愈固。居之愈安。而樂之愈深矣。聖母



洞識天主妙美。雖僅有際。非眾神聖可比。涓埃。即其愛慕之懷。安樂之深。必不可測也。聖經畧示天上諸聖所受福樂。設譬曰。天主以清淨之滿河。飲足神聖之渴。又述天主語神聖始入天門者曰。善僕忠僕。即入爾主之樂是也。世樂最微。可謂入於我中。天上之福樂極大。故謂我入於樂中。譬之海焉。汪洋浩蕩。人入之。即上下前後左右。涵泳於其中矣。夫觀天主之賚善僕。則接其母而隆報之。其福樂之極。當何如耶。聖母之神樂神福。其畧可測者固如此。聖母身體之福樂。亦必應靈魂所受之福樂。按經載天上聖人之形體。無不全備。四肢相稱。無餘無欠。氣度舒和。色貌麗美。精潔強健。內疾不發。外患不侵。身射異光。七倍於日。周旋六合。不待時刻。



透山入石。了無畱碍。由是先知者。約論形體之福德。歸之四端。曰。光輝無暗。曰。強固無患。本體強固。不受外物之害也。曰。輕捷無待。曰。神妙無碍是也。聖母之形體。從始生時。全備潔淨。未嘗違和。盡無缺失。死後又無虧損。并無染汚。則至天上所受之福。所被之榮。其奇妙。胡能以言悉乎。雖然。聖母天上所享之福樂。不止於此。尚有多端。後詳之。詳見別卷。

聖母端冕

聖經每云。天上神聖。槩如帝王。衣衷衣。冠冕疏者。蓋從人世所尙。以表天上聖人形體。所得奇美文飾也。又推上古世俗。凡戰勝者。必以花冠。或寶冕加其首。以旌其功。而顯榮之。聖經以故。由世所



習所重者。迪人以明其所未見未聞之妙景。而因進之於精修也。由是從古凡繪聖人容貌。必繪光冠。周圍其首。意示諸聖在世時。匪徒義禮約束其私。又以高志強力。獲勝三仇。垂光榮於萬世。以故天國亦加以永福。不易之寶冠也。然冠有三品。一曰旌潔之冠。所以加終身固守貞潔者。一曰旌義之冠。所以加於爲主輕生致命者。一曰旌教之冠。所以加於劇心殫力。宣布聖教以勸人善者。是三者。既克難忍苦。以奉天主正旨。建立奇勳。則其受上報於天國。豈不宜哉。至論聖母天上所得之冠。兼含三冠之美。蓋聖母從母腹。即已矢貞。已誓終身不變。其後雖受天主降孕。終無損染。於以立童貞之美節。而爲萬世之表儀。是聖母之貞潔。超萬貞潔上。



則天主旌以福冠。必有異焉者矣。次聖母生平爲聖子爲道義。所冒窘屈艱難之至。古今聖史未及罄述。西默翁預對聖母。指所抱耶穌。有爾心幾爲憂刃殘傷之語。蓋聖母視其聖子。以聖德苦死於刑。與盜賊無異。實受憂刃於心中。倘非自立強志。又非聖子多加神祐。必不可當矣。故有聖論之曰。聖母雖身未死於難。而靈心屢如死也。蓋凡觀惡徒加刑辱於其子。聖躬其心之受痛。不啻若親當之。又聖子歸天之後。凡聞聖徒及聖門諸弟。爲道受難者。即哀憫體之。以其靈心并受是難。則是無時無刻。不受憂刃殘傷。而痛死也。以故後聖每稱聖母。爲諸致命死於義難者之主母也。是知天上旌義之福冠。加於聖母者。必又奇矣。又次聖母早蒙主牖。



明徹聖教之微妙。及精修之規範。即悉傳於同志之女。而爲之師。迄壯時。隨時隨事。無不致其愛人之誠。而進之於道德。至於聖子升天後。屢蒙遺命。代勉門人。遂殫心身之力。以奉主命。又居如達國中。或於宗徒及諸門人。詳說聖子生平所言所行。并所垂聖教妙旨。無人不受其訓。遠近賢愚。親踈老幼。咸以爲師爲母焉。以故聖師稱頌聖母。以爲衆生之歸宿。聖教之楨幹。乃升天國。而受母師之奇冠。又豈不宜哉。即是可推聖母兼受此三冠之異。則所享非常奇妙之福樂。又安可測耶。至於世間。凡感聖母神風。或修童貞。或致命義難。或宣聖教。其登天域受福。必歸功聖母。而聖母福樂。更無時不增長。愈不可測矣。



欽崇聖母何義

聖母生前以德。死後以福。超絕諸品神聖。而位乎其上。則吾儕欽崇聖母。亦加於諸品之上。誠爲至當。茲先推明其所以然。次畧釋欽崇實義何在。以率世人效法。而致其虔云。

一、天主從無始來。即寵異聖母。超邁倫類。又自生迄死候。時加恩錫。畀其位次天主。而於天下天上爲至尊。且付以統御下世之權。是則天主尊寵皇母。至重至懇者。人盡天主之臣僕。可不以欽崇天主者。欽崇聖母耶。

二、在天諸神九品。在世聖人萬類。悉蒙天主默牖明訓。無時無處不致其欽崇之極。當天神受造首刻。即預知天主第二位聖子後



將降生貞女胎中。其欽崇聖母。從是始矣。至視其在母腹。備具種種聖德。屢降朝禮。揚其奇妙之功。迨升天之日。諸品神聖。下臨左右。趨事護送讚頌。無不悉著其尊敬之至意焉。至若古今聖人。欽崇聖母者。亦無所不至。或宣揚以口。或紀頌以書。或承天主默啓預示其異。徵於未生之前。或觀聖母精修。悉載其行實於既生之後。以及身後所遺聖跡。無不闡揚彰著。以提萬世敬慕之心。又或捨巨資。建殿設像。虔祀貴禮。又或立貞女潔士之院。束以芳規。令其朝夕事奉。稱頌聖功德。而倣效之。或又傳布讚謝聖母靈跡多端。迪人祈禱。以廣聖母恩澤。是則上下神聖。欽崇聖母。咸若是懇切矣。豈所等獨可或後乎。



三。天主非止擇取聖母爲其母。兼立一次已最尊之位。定爲神民  
恩母。因賜以異智異能。使管攝天上諸神。地下諸魔。及世間萬民  
也。以故聖奧斯定嘗曰。聖母旣誕救世真主。其救人之權大於衆  
神聖之權。無可比也。然則聖母仗庇。天主所賜之權力。無難不克。  
無敵不勝。無疾不瘳。無魔不服。無物不聽其命。乃生斯世者。圖脫  
種種苦難。免種種魔計。於聖母可不仰慕而欽崇之耶。矧聖母非  
特無所不能。又且無所不慈。其於人之艱難。時切拯救。無待祈求  
而自給。古聖有云。天主凡將降戮討人之罪。聖母必爲祈禱。或息  
主怒。或減主刑。或寬罰限。或勸改圖。或去誘始。或破魔計。或杜邪  
端。卒以保其命。全其德。致其福也。先哲嘗釋其所以然之故曰。天



主異寵聖母。報其功德之大。即以其所有至能。至智。至慈。三德之妙。旌之。令其以是亞於己。而懸絕眾神聖也。以故聖母既蒙主立爲萬民恩母。凡遇人生艱難危險。無不欲以所得之權。援拯之也。故伯爾納鐸聖人。嘆謂聖母曰。世間未識爾能。未驗爾慈。未沐爾惠者。是即不讚爾德。不欽崇爾可也。豈不誠然哉。

至論欽崇之實義何在。此論雖多約。以三端。心。言。行。是也。在心者。又約以三德。亦不出信。愛。望。三者。信者。信聖母形之真。靈之潔。德之全。功之奇。悉皆冠絕眾類無疑也。愛者。即殷切愛慕。仰重聖母於萬受。造者之上而不止也。望者。即凡遭禍難。及魔鬼世俗邪慾。三仇等患相攻。必祈求恩母提祐。不弛不惰也。即或不遂所求者。



慎勿以聖母爲不知不能。或不慈而失望焉。蓋或因爾求其所不當。倘遂爾求。反無益而有損。又或求雖合義。而非其時。此正聖母至慈所在。若求所當得。又及其時。聖母必允慰爾望矣。

在言者。亦約以三端。一感謝。一讚譽。一宣布。人既無時不沐聖母恩澤。則心所愛慕。口亦隨之。凡所以謝其福庇。讚其美好。而宣布其神功者。或言或書。預竭忱悃。使衆人咸知。尊敬愛慕。匪徒自罄其私也。

在行者。約之有二。一在禮拜之虔切。一在效法之精勤。蓋凡人有所諸內。必見諸外。心之敬慕既真。則形之對越恐後。其瞻拜儀節。必有恪恭。而無褻慢者。又凡能竭昭事聖母之誠。必須實踐聖母之



跡如徒云。心信望。言讚謝。體叩拜。而行莫之踐。甚且違犯規誡。此則聖母之罪人也。古西有一童稚向聖母。恒誦其經課。稱其功德。而所行不潔。實反聖母。聖母憐之。而顯示以夢。舉穢器盛美味。賜童子。童子不敢就。由是聖母設訓曰。汝常所誦經課。所奉讚譽。吾豈不喜。第爾心情未潔。正猶美味而盛以穢器。何以令我享納乎。童子寤。深自猛醒。痛改前非。卒成聖德人焉。以故聖伯爾納鐸曰。凡欲遂所求於聖母者。勿懈於其聖德之教也。蓋聖母極謙極貞者。汝心倨傲。汝身污濁。而冀望寵祐。妄矣。異類難聚。異情難和。理之自然。可不惕哉。此外尚有聖師欽崇聖母數端。爲聖母所鑒悅。令垂訓後人者。畧述於左。



一玫瑰珠規。見啓蒙。或用六十三珠規。並詳三卷中。一教中聖人欲表其欽崇聖母之虔。非止立制多規。及祭祀禮節。又於每年每月。簡定數日。聚眾專禮聖母。念其功德。謝其恩惠。又於是日前。有持齋不飲食甘味。以苦其身。節其慾者。又有於是日。多行拯濟貧病者。又有衣麤束縷。以鐵笞身。以鞭策背者。總皆計圖。尊敬聖母。庶幾獲其福寵也。

一聖母嘗以最美最約之規。示一貞女。即令每日誦念主經一次。聖母經四次。奉獻天主第一位聖父。并謝其原賜聖母奇惠。前四端。次復誦念如前。奉獻天主第二位聖子。并謝其所賜聖母奇惠。中四端。終念如前。獻謝天主第三位聖神。所惠聖母後四端。誦謝



既訖。祈求慈主爲其德勳。賜恕我罪。迪進我善。震懾我仇。登我天國。使享永遠無窮真福也。由斯數規。各守其所能爲。以盡欽崇之本分可也。

聖母於欽崇者何報

聖母之恩。施人世也。極大極繁。無時不著。無方不到。無倫不沾。太陽之照。雨露之濡。尤不足以比之。即甚愚魯無知之輩。恩猶及之。則其所以酌報欽崇之誠篤者。又何可測耶。茲提其要。可類推云。一凡以虔心欽崇聖母者。必蒙立賜。心安體寧。無躁急。無顛躓。不屈於難。不畏於敵。不迷於邪。不退於善。是也。蓋聖母莫大仁慈。既遍邇天主。荷其寵異。而以權能統照下世諸務。凡可施其憫惻。何



所不至哉。昔西有舟師。從幼欽崇聖母甚懇。因古規日誦一百五十珠經。一日渡海。狂飈四作。帆敗檣毀。舟將溺矣。同舟咸驚失色。獨舟師優裕如常。執串恭誦聖經。托庇聖母以待其援。頃時忽起山岑。環峙圍舟。旋令安靜。眾數山峰。百有五十。不知其所以然。羣相驚訝。於是舟師釋之曰。茲乃聖母之救我眾也。蓋我每日嘗敬誦百五十珠經。恭獻聖母。故聖母以此應其數。顯其慈耳。言訖。修舟以行。山忽不見。眾乃感謝。

一聖母凡遇敬慕虔篤者。非徒趨援其難而已。尚與共其所得於主之異能。異智。異仁。及諸善咸積焉。蓋凡父母之智賢者。無不欲其子之肖似也。聖母全德全慈。既容受善人爲子。則必以其所得



異寵智能。與所愛之子共之。是故聖人有云。耶穌爲首。聖母爲頸。凡衆爲體。此蓋言耶穌。凡有施於其聖母。聖母必不自私。將傳之百體。而養育成全之也。嘗考往籍。凡專篤欽法聖母者。其心智德力。往往超絕羣類。甚有愚鹵不解文義者。得其福祐啓悟。不假師傳。不由書籍。竟能通達萬理焉。又有緣此洞徹。既往將來世務。及人心秘密隱情。而預告之。以益人之生。使達於道也。又有以人頓行天神之事。或一身一時。異地並見。或頃刻飛馳遠方。或穿透山石無碍。或但稱聖母名號。而獲寵祐者。又有別冊詳之。

三。凡專篤欽崇聖母者。身雖未離人世。實已得升天受福之質矣。蓋聖母既以寵福。及其權能。冠絕衆神聖。而位於聖子耶穌之右。



則其所愛忠臣義役。豈能忘置之。不一提挈。使共享天上真福耶。  
經載聖母言曰。凡聽我命者。必不辱。凡仗我而行者。必不墮。凡宣  
我德者。必將常生。又云。凡承我訓。日待我門。伏受我祐者。究獲常  
生。永享真福於主臺前是也。熱爾瑪諾大士。謂聖母曰。人沐天主  
恩澤。靡不自爾先容。不則恩澤。必不可得。然則謂爾脫人於冥獄  
之永苦。而率之於天上之永福。不亦宜乎。安瑟爾末名聖人亦曰。  
聖母所棄。不得不亡而降。所寵。不得不存而升。信矣。前世聖德之  
婦曰。生大氏爲其乳子。每祈天主福祐。主答曰。爾子。吾托聖母久  
矣。勿慮也。伯爾納鐸聖人謹約聖經之旨曰。凡欲遂所求者。托之  
聖母。必將不負。凡希詣天享福者。信從聖母。必將不悞。豈不然乎。







聖母行實

卷之三

自聖母始胎。以迨升天。其間功德。爲諸賢所讚美者。前論已畧講矣。茲述其所顯異績。令人知所當趨。與所當避。以致欽崇之全功。獲聖母之寵于無已焉。聖母至慈至靈。時感時應。其靈驗聖跡。古今聖賢筆紀。未能罄述。要不過千百中之一二。茲則更拔其尤奇者數端。彙之以便考證云。

聖母提佑誦玫瑰珠等經者

玫瑰珠經凡十五端。乃聖母傳聖多敏我。令其訓誨世人者。凡誦經時。并以心思想耶穌及聖母。生平各端事實。守是規者。每見聖母援拔于惡。提進于善。護庇于難。斂束于順。生死不棄不忘。又有



古用六十三珠經。乃取聖母在世六十三歲之義。凡敬誦者。得聖佑亦然。敬述數條如左。

一小童牧羊者。初習十五端經規。每日恭誦。因成吟咏。頌讚聖母功德無已。時有異端惡徒。聞其歌不悅。呵禁不止。怒而斃之。未幾復經是道。復聞是歌。驚異之。左右視。則向所斃之歌童是也。乃更駭問故。童曰。人能斃我。天主聖母能活我。何異之有。惡徒爽然驚悟。即辭邪歸正。始欽崇真主及聖母。以終其身。

一有姊妹三人。皆勤欽崇聖母之禮。值耶穌誕前一日。至堂中解罪。解畢。問賢士以何功。可致聖母臨格。獲其福寵。賢士答曰。形靈潔淨。爲首功。專誦行十五端經課。爲次功。苟如是。聖母寵福。必可



格也。姊妹既領聖訓。即以虔志潔心祈禱默對。候聖母之默照焉。至深夜時。聖母果格。其衣艷異晃耀。非日月比。四面銘刻聖名瑪利亞金字。先就長女謝其誠功而降之福。次及中女。又次及少女。然皆衣金衣。而少遜美於其謝長女者矣。二女不悅。以告賢師。賢師解釋聖母心意。設訓曰。天主及聖母之福照。正應人之功績。恐二女欽崇工課。不若姊虔誠耳。二女伏領真教。即更盡力欽崇。功加倍焉。卒格聖母。均致其愛之之驗。降福無異也。三女幸復領聖母吉照。甚喜佩謝不止。仍誓終身守貞。以事聖母不退也。

一士人某。初以俗染。懈怠善功。久不知改。幸逢名聖多敏我。以善勸。令執聖母十五端課。免生前死後大難。士感動。日後善念日熾。



神力日強。痛恨夙染。自欲湔滌。一生罪犯。奈罪衆且隱。一時不能  
悉記。心愠不寧。痛悔不止。忽見一紙從空而下。備錄生平所犯愆  
過。乃感聖母恩澤。以告司祭。得領釋解之惠。心懷舒泰。因執聖母  
課功加倍焉。

一寡婦者。謹訓三子。從幼習聖母功課。日先誦經一串。始赴門。一  
日三子往學。長子失足墮水。了無踪跡。二子奔告。母聞之泰然。至  
聖母像前祝曰。此子吾向托聖母。今日任取任與。惟聽聖母仁命。  
敢違且怨乎。祝訖。往觀見其子浮水上。躍然呼母。觀者大奇。援之  
登岸。問何以不死。答曰。吾室中所敬聖母聖像。明至水上持我。不  
令沉溺。故得不死。聞者皆感大恩。爭欽崇聖母。以獲福祐。



一幼者某。幸承二親仁教。早習聖母實學。每稱其功德。誦其經文。後感於邪友。恣意狂悖。然終不敢盡棄聖母工課也。因頗存改圖之望。後感疾垂死。自覺其靈魂在天主臺前。聽審生平善惡輕重。一天神持衡衡之。乃惡業竟重。將伏罪下獄。時復有一天神。將其平生所生誦聖母經串。置衡之輕盤。而善業復見重矣。由是天主赦其愆犯。報其欽崇聖母之實功。以儆世之怠惰者。

聖母護佑帶聖衣者

聖衣乃聖母親授聖斯鐸格。命其傳訓士民者。又許寵愛帶聖衣。及守定規者。護祐其在今世。提拯其在煉獄也。每逢瞻禮七。特慰祐其靈魂。以早登天域。曾聖母自立聖衣會。無不欲其從者。切愛



聖母誠懇而仰止真心以保其功。而勉其行。無時不施神惠。顯其慈及與其能之至也。茲陳數端。以便明通焉。

一昔弗朗濟亞國有一類思賢王。欽崇聖母最切者。因忤徒已叛。即敵攻。戰時炮子擊一名武士。因聖衣阻之不能進。亦無傷無痛也。賢王既見。即入聖衣會。終身荷帶聖衣。雖數行軍敵陣。毫無被傷。當幾千兵。已視斯靈跡。亦求聖衣。爭虔事聖母。至死無易矣。

一依斯巴尼亞國。古有巨家一女。名加大利納。既染癰瘡。久已週身無動也。切望聖母私恩。望親送其聖衣堂。領聖衣矣。已衣聖衣。及許愿至死虔敬聖母。忽癰疾療痊。易動易行也。眾觀神恩。即讚謝恒加敬慕聖母無忘焉。



一近世依斯巴尼亞國名海島。有富家士。其被傷。血湧出不止。垂終無生之望。醫士劑藥無效。全家虔誦經無驗。時有修會貞女。勸病者。進入聖衣會。已領聖衣。血即止。病亦痊愈。其携本城士民同趨聖衣堂。朝謝聖母隆恩。至死不絕也。

一古善者一人。欽崇聖母甚切。忽染瘟疫。未幾垂死也。其妻將瘟者聖衣。執二衣邊安瘟瘡兩處。即跪懇祈聖母痊夫惡病也。經未完。病者啓目動舌發言。妻不甚喜懼。越切誦經。勸夫同求。望聖母神恩也。當聖母惜二配。施恩瘟氣少頃退。瘡亦療痊。病者如故。即赴聖衣堂。獻禮感聖母大恩。將其聖衣以金銀錦繡置聖堂也。後人見聞。世世盡其敬愛聖母無已矣。



一弗朗濟亞國。近古有名城。因失火。燼燃房宅甚多。時有一位大德靈牧。以息火。命僕拋置聖衣大火中。且其懇求聖母異恩滅火也。聖衣方落。烈火卽猛炎發出。眾視驚懼逃避。未幾烈火全息。無見。士民偕赴聖堂。謝聖母洪恩。末世不忘。日加虔敬聖母百倍矣。聖衣妙跡。史不盡述焉。

聖母提祐持其齋者

一善人者。欽崇聖母甚切。忽聞弗朗濟亞國。堂內聖母神容。靈恩甚眾。步往瞻禮。歸時染疾。入仁院。病愒未及告解而卒。魔將推之冥獄。受其稱罪之僂。聖母鑒其忠情。卽爲降救。乃具述其持齋。誦經濟窮。自責諸功。叩請於耶穌。祈恕其弱行。赦其犯罪。耶穌允之。



命魔釋放。魔告以終時所帶重罪。必不容赦。耶穌命魔緘口。勿得逆命。蓋聖母權命所及。非眾魔所能阻也。魔退去。聖母乃令其魂復合本體。以全悔解之功。院眾視死者復活。驚欲去。死者呼曰。勿驚。但請司教者代解我罪。爲幸甚矣。司教者至。詳前愆始末。獲行解救。寧靜而卒。

一有室女。矢志永貞。投聖母前爲婢。因持瞻禮七清齋。每日謹完工課。不惰。時有強卒悅其色。將強圖之。室女見迫。即懇慈母顯祐。乃對惡卒言曰。今日乃聖母瞻禮也。我爲聖母持齋日久。未敢違。且吾初入教時。幸借聖母名號。稱瑪利亞。子何敢圖汚我節。以招聖母義怒耶。強卒聞之。如被雷擊。惶悚而去。不復敢瀆也。室女伏



謝聖母。遂執節終其身。

一賢室之少女。早承親師指教。愛敬聖母深切。每誦其經。習其跡。朝暮不忘。凡遇聖母瞻禮。必先持齋加功。苦形修靈。以奉聖母。希獲其寵焉。時聖母升天瞻禮。屆期自覺愛慕之心。懇切異常。仰求携升天國。永依末光。乃蒙聖母賜允。不勝欣喜。以告其親。持齋自備。其親以爲遠。未信。而賢女如期入堂。跪聖母像前。依終規執燭。心目仰望。聖母降取。至亭午。果有無數天神。擁護聖母臨格。顯承天樂。名賢女相隨升天。其親見女。仍跪不動。近視之。靈魂已去矣。因而信感聖母不已。聞者咸讚頌焉。伯納弟諾者。聖人也。蒙聖母寵。自幼能剖善惡。別精粗。矢志貞修。托聖母爲主保。每瞻禮七



奉齋執清課。不敢忽也。功德日彰。聖母施報。亦日倍。一日聖人。從高座述讚聖母妙功。忽有大星垂注其首。爲衆目所共見。是知聖人之言。足感聖母。故以是報其功。表其德。使照萬世不汲也。

聖母蔭保國家

一中古羅瑪天降霪雨。川河倏漲。巨蛇毒蟲遍城市。及水退。繼以毒蒸疫作。死傷萬計。時有大聖額我畧。持攝聖教。忘己救衆。劇心殫力。以濟公難。但瘟毒日盛。死者日繁。無計可禦。乃往聖母名堂。躬捧古像。率倡士民。游巡街市。籲禱天主垂祐。聖像所至。毒氣旋消。隨在湮散。至一河橋。明見天神收刃入鞘。示主怒已息。天僇將止也。士民見者聞者。感聖母弘澤。從是是倍加欽崇焉。此聖母像



今猶存殿中。所施靈驗拯世難者。難更僕數也。

又後有外夷。復圖是國。統寇數萬。水陸交攻城內。士民向識聖母慈能。仍捧聖像。巡城祈禱。頃刻天變。黑雲忽集。冰雹衝飛。殘毀寇兵大半餘者。或以爭利相仇。或以誤認相殺。又損其半。旋遁去。不復見矣。從是共斯當府。以屢蒙聖母保存。始稱爲聖母城。其士民新創寶殿。用垂聖母功德。於無窮焉。

一因多國。有名市城。素敬聖母。但緣富饒。致有外寇萬艘環攻之。時城內軍止一二百人。惟仗聖母之力。拮据隄防。數月。球至圍解。賊兵反多損折。而我軍不傷一人。初賊攻城時。每見一奇美女。懸立城上。蔭護衆民。火炮不能發。發亦不中。賊去後。語傳城內。始知



聖母不負望也。

一翁格里亞國。自古以富強。聞有聖王斯德範者。以禮約民。迪於正道。久享安寧之福。忽有隣邦犯順。聖王起兵禦之。將出。復思三軍之衆。非攝以天主及聖母之神力。難致成功。即伏聖母臺前。祝曰。至慈聖母。爾若允斯小國被殘。及歸化善民潰散流離也。不敢不受命。但祈勿使人疑。吾以無志無望。以致勢窮如是極也。倘時難終不可免。小僕寧以躬受。不使此無罪善民當之。祝畢。自覺心志加強。無復疑慮。詰朝方辨色。忽敵將奉主命遁去矣。聖人幸全其民。不致傷殘敵衆。以爲聖母護庇之明驗。即率國民。感謝不已。

一安日里亞海中名國也。聖王厄都敷治率民於善。時有大尼亞



國惡夷。久蓄異謀將發。聖王覺之。恃聖母庇祐不爲意。一日至堂瞻禮。正祭時微笑。左右大臣奇之。祭畢問故。答曰。是時正蒙主示。明見大尼亞王。統數百兵船。乘風將攻吾國。登舟時。忽失足沈死。吾是以笑耳。因知天主與聖母福蔭之地。必不令傷殘於凶惡也。

聖母啓牖愚蒙護提學者

一亞爾伯多幼時。切向格致之學。而短於才。旦夕祈求聖母洪祐。勤行聖母日課不怠。聖母鑒其誠。顯謂之曰。汝所求必獲。但至終期必忘。令汝明知其學。非人力所致也。從是亞爾伯多聰明越眾。無籍不通。無理不究。卒爲名師。後已垂老。一日方與衆講。一生積學頓忘。不能復記。因憶聖母神囑詳告諸弟子曰。吾命終矣。即辭



歸內室。默道加功。以俟聖母終召焉。

一篤瑪斯天學名師。意大里亞國人也。生二歲。偶遇片紙。固擒不釋。乳母奪之。輒哭。見其中所書。乃天神朝聖母經也。因大異。還之。遂止哭。吞之如飴。由是識者。預知其爲聖母寵祐。後必樹名於德學也。至十歲。文學已成。即攻格致之學。四載。邁其曹耦。是後。愈明物理。愈慕道德。欽崇聖母形靈之潔淨。伴等天神道德之實學。超絕人類。優入聖域。

一路伯爾篤。弱齡攻書。鹵莽不通。爲同學羞。屢祈聖母祐照。倏忽大變。爲中人以上人。洞徹理奧。同學罕及。

一童子黑爾瑪諾。家寒。學無資給。又短於才。未能上進。以故心志



不定。功業不成。於是伏歸聖母。依規行課。誦祈不止。聖母寵愛之。凡所求無不允。屢顯跡慰其憂。治其疾。釋其疑。啓其聰。且示以未來之隱。使理無不究。無物不格。卒以博學聞於後世。又復加其日用之需。日措隱處。令之自取。至終不乏焉。

一古有聖人曰道瑪。都我。舉攝聖教。初任神治。思治中被聖化者。僅十七戶。其餘百千萬衆。尚迷於邪。朝暮籲禱。求主示從何道。以率愚民歸化也。未幾蒙主耶穌聖母瑪利亞。自天降慰。允其所求。時命聖徒若望。以聖教微旨。詳誨之。使得轉提愚民。從是聖人所造靈跡無算。化億萬衆。奇功滿冊。畧見聖人行實中。



聖母援拔垂終之難

一尼閣老古大聖也。明德精修。其所守嚴規。獨以欽崇聖母爲首功。其所行。務愛人如己。更切於勸善。及老德成而氣已衰矣。其染疾時。每聞天神奏樂。舒其懷。慰以升天之望。垂終。親見吾主耶穌。及聖母親臨接之。謂曰。忠僕喜兮。汝當入汝主樂兮。聖人不勝忻幸。大呼笑嘆。左右道友問之。乃具以告。言畢而逝。善哉斯逝乎。遺樂於友。遺馥於室。遺表於後矣。

一世胄大尼老自幼切慕聖母。以聖母工課爲所學首功焉。忽遭奇病。諸藥不能愈。聖母乃抱嬰兒耶穌。臨其榻。置之懷中。大尼老不勝欣喜。病卽愈。是後復思病中。聖母所囑神言。卽絕財辭親。入



耶穌會。方一載。大嗜德味。每求聖母早脫之於塵世。携登天國。正近聖母升天之日。賢童思願甚切。托老楞佐聖人轉求聖母。賜於是日畢願。潛知聖母俞允。即殫神力。以備終規。卒之前六日。感微疾臥。諸友猶不爲意。乃自云終期不遠。至聖母升天日。果出衆友意外。從聖母飛天矣。

一依撒伯大聖德之后。生子加樂。早習欽崇聖母之實學。凡誦經至念天主聖母瑪利亞一句。即明內義。喜慶聖母所獲天主殊福也。後出征逆寇。死於意外。偶有所犯主誠未解。應墮冥獄。其母聞之。伏哭聖母像前。乞提祐。遂得形靈復合。獲悔罪領赦之大恩焉。蓋聖母感其生前。明內義之功。而報以死後享真福之恩也。



一額肋濟國有一異端。其子游善師之門。日聞正言。見正行。一日父問子。習何業。讀何經。子以正對。父發怒。投其子於火。將焚之。子入火不懼。惟誦所習正規。祈祝聖母。聖母即以寶衣覆之。不使少有傷也。既而母呼其子不見。乃從火中應焉。驚救出。始感聖母神恩。其母亦辭邪歸正。教司捕其惡父。投火中。惡其殺善子也。眾聞而快之。

一濟理樂聖教名賢也。自幼切慕聖母。謹習其經課。朝暮執工不惰。學成掌教治民。作有奇績。著作精美。多闢異端。宣主教之微旨。保聖母之榮名。故其終日聖母切援振之。使其無險害。而有寧終也。



聖母提援貞潔之危

一古有賢王名恒禮格。早蒙天主及聖母默啓。矢志守潔。後從大臣屢請。娶隣國公主。古尼恭德爲后。其聖德實王好喜。以德相迪。各守貞潔。不同宿。由是令聞廣播。萬民欽仰。國家受太平之福矣。乃邪魔生妬。圖間夫婦之情。於是聖后初覺君心懷疑。欲爲解釋。先祈天主與聖母扶助。次以火煨鐵板置王前。跣足蹈之。証己未嘗喪潔。蹈火之際。忽天聲降曰。貞女勿懼。聖母瑪利亞必將祐爾。王於是甚感聖母。悔其妄疑。從是二人加勤倍功。爭先精修。以報聖母靈惠。

一弗郎得國古有室女。理都未納。幼志永潔。因以欽崇聖母不間。



其功既長。應婚二親爲覓良士。欲歸之。女驚惶。苦懇二親不允。於是赴聖母堂。祈求賜祐。勿使負守貞原志也。若無計可免結婚。即賜通身染疾發瘡。令人厭棄。聖母鑑其虔誠。即如其求。俾感惡疾。穢瘡遍體。親戚無敢近。於是賢女自喜得意。併謝聖母。從是臥疾三十載。未嘗移身。大著忍耐之德。以至上召天神。下召人衆羣來瞻仰。或以慰其苦。或以自益其身也。

一諳日里亞國。古有幼童厄蒙篤者。早沐聖母宏澤。志於潔貞。謹束其身。避邪友。侍賢師。積德博文。日加進也。乃聖母欲旌其潔。深其學。即顯於目前。賜之最美珍石。令以爲記。從是賢童猛奮神力。致其精修。以報聖母重恩。一日出城散步舒懷。忽逢邪友。邀以遊



戲不從而返。適遇絕世美童來迎。問爲誰。童曰。吾乃汝信件。偕適學。偕返室。偕相出入。猶未識耶。汝視我容。以幾知我矣。賢童見其額。有耶穌二金字。驚駭伏叩。耶穌復慰之曰。因汝方避邪友。以保靈潔。故吾特降慰汝。以堅汝志。言訖不見。賢童不甚神樂。榮福之重。愈加嚴功。終入聖域。爲本國楨幹。

一篤瑪斯古世家之嗣。從幼年蒙聖母寵愛。僅滿十歲。志於精修。辭親友。絕世謝愆。進修會院矣。其親不悅。盡力阻撓。至令淫女。竊入汚之。賢童不勝悵恨。持所植火炬。驅逐淫女。閉戶以炭畫十字。號於墻。伏祈耶穌與聖母援祐。誓終身守潔。時困睡。有二天神降臨。賀且慰焉。且以神帶結束其腰。謂從是不患淫惑相擾矣。



聖母濟窮振難

一早寡賢婦。矢志守節。其女亦資性淑善。願保童身。母子竭力事奉聖母。恒執工課。但因貧乏。以不能親至主堂瞻禮。聖母爲憂。一日携女於聖母像前。伏告曰。吾窮甚。育此小女實難。願托聖母慈悲蔭庇。迄終勿置。次謂小女曰。天主聖母。卽汝母也。今後孝敬事之。以慰我願。以盡汝職焉。次日乃有客詣門曰。曾蒙汝良人以百金相濟。久遠未償。今持奉還。幸收之。擲金而去。母子莫知其所。以然。第歸恩聖母。以金買衣。日至堂瞻拜與祭。表其感佩之誠耳。

一賢婦者。僅育小女。以所習欽崇聖母實學訓之。女外美內鈍。難習神業。荒嬉自如。賢母屢責以正訓。恐其苦難。姑令習念耶穌瑪



利亞二句。必將有益無悔也。女以爲易從而習之。日後女閑戲園中。魔至牽其臂。將推入幽獄。加永僇焉。女時見迫。卽呼耶穌瑪利亞聖名。魔惶驚釋放。恨怨而去。女幸脫。奔告其母。母乘機復勸。終至改圖。加欽崇之功焉。

一近世二十載前。意大里亞國名家幸獲一子。長不能言。二親常以爲慮。計無所出。獻之聖母名堂。祈禱提祐。不久舌解。應答如流。二親感激。倍加虔敬。讚頌聖母。小童自圖蹈聖母潔跡。投入精修之會。終身不悔。

一昔有一婦。初染惡習。遂不潔。一日趨聖母堂前。欲入一觀。乃當門聖像。却之不容。婦由是悟其罪惡。遂叩聖像祈禱。先容。必將改



圖祈畢見容入堂直至主臺伏仆哭號求恕生平重犯出復叩聖母像前謝恩并立誠志從是束身改跡以補前失未幾退入深山自責自苦竟破魔計備積大德入聖婦之品矣所謂大德之積幸蒙主祐即致聖德之積是也。

聖母罰修不肖者

一中古西南國有異端名搦斯多畧者違背聖教私傳邪說迷惑善民甚至誣聖母非天主真母以故教主及當時聖賢咸闢之西總王亦不容居國中投諸荒裔竟染異俗惡疾唇舌又被毒蟄殘虐四體腐臭而死凡聞其惡終者莫不稱快乃知聖母於善者爲慈母於惡者即爲嚴司。



一如禮亞諾賢王之孫也。即位初。頗欲學其祖武。以收民望。己而惑於邪說。背教虐民。漸染不止。當時聖賢進忠勸者。王皆不容。尙貶黜軍戮。又肆誇欲滅天主聖教。毀燼諸聖殿宇。忽伯爾西亞國。以二萬士衆。侵其疆。惡王統軍出。出時尙發滅教殺忠之意。當時聖賢偕諸善民。旦夕祈禱天主。哀懇聖母。預備降祐。惡王迎適。忽見一矢從空而下。直貫其胸。抽之又傷其手。痛甚。知不可生。切齒怨恨。天主與聖母而死。是時聖母顯於罷西畧聖人。示之曰。惡王中某聖。從天所射飛箭。死於陣中。汝可傳善民。令勿復慮。數日後報至。如其言。

一東國有不肖王哥頗尼末者。棄先王仁治。習於異端。焚聖母容



像恣其狂詆。天主僂及之。始發毒瘡。致極痛。繼又染瘡。苦不能當。自恨而死。死時大呼曰。獨緣獲罪。瑪利亞聖母。乃生時即受永火之僂。因命國中士民。從是欽崇聖母。勿致簡瀆。而招不絕之悔也。一異端惡師。與其徒談左道時。及瑪利亞聖母簡瀆鄙賤。與俗婦無別。談畢下座。足高揚氣而出。眾嘆稱送至門外。將登車。其馬素馴。忽變猛烈不可制。且蹄且嚙。異端四體俱遭殘碎。眾視之駭然。乃知簡慢聖母之罪甚重。見世受僂。其受後世永僂。亦可推也。又是時是地。更有同類惡徒。忽聞隣人述言。某處每見聖母像。施靈驗無數。以應萬民之望。乃笑曰。吾圈中一畜無目。置之瑪利亞像前。不識可復明乎。遂携瞽畜往。意欲致笑緣耳。畜至像前。厥目



即明而惡徒乃失目爲瞽。反見笑爲衆民僂矣。

一如達國。惡徒偶至他方。見壁懸聖母容像。即發恨。泥汚之。士民聞見者以爲恨。然皆畏惡。不敢圖且訟焉。時有一人。自幼手足痿痺。恒臥不能行。乞食度生者。聖母顯命往僂惡徒。吾將祐爾。病人如命。匍匐請命於官。告以聖母嚴命。官初笑以爲顛。病者曰。但許我僂彼以驗聖言。不亦可乎。官乃命衆捕惡徒。至罰場。病者初尙須人以行。行自覺力生。愈近則力愈增。既至。其力已全。自立自行。不復須人矣。官令執劍親施天主之僂。病者喜躍。直前刺之。惡徒初不爲慮。執劍來敵。乃手足忽如痿痺。不能逞。瞬息被刺而死。法司見之。共諸士民嘆訝聖母至能。自此倍其欽崇矣。

終



THE HISTORY OF THE

